

Festrede zum 1. August von Kari Camenzind (Mundart)

Verantwortig ibernäh und am Läbe Freud ha

Gschätzti Gersauerinnen und geschätzti Gersauer
Werti Fraue und Manne us Behörde und Verwaltig
Liebe Gäscht aus Nah und Färn

Ja genau – das isch mini erschti Reaktion gsi uf d'Aafrag vo de Frau Bezirksammann Sandra Häusler, öb ich hüt d'1.-August-Räd chönti ha.

Ja ich meine; I de letschte Jahr händ da en liberale Bundesrat, en schwyzer Regierigsrat, en kreative Musigschaffende, de ältisch Gersauer und ja sogar en Radwältmeischer am Rednerpult gstande. Und jetzt ich – wemer ufem Flyer unschwär cha feschtställe - wo einisch meh vu de Astrid Camenzind sehr guet troffe worde isch - en Polizischt z Lozärn und Milizpolitiker – Fertig

Ja wemer grad ghört händ; en Gersauer mit Liib und Seel – ufgwachse im Ober-Rotzingel und sit über 10 Jahr wieder s'Gersau im Acher obe wohnhaft.

Und ja genau - über was red ich ez:

Als Dienschtschef bi de Polizie und als Kantonsrat vum Bezirk Gersau ibernimm ich ja en gwüssi Verantwortig – nid nume für mich. Und wer mich echli nöcher kännt der weiss ja au, das ich am Läbe scho auf Freud ha.

Und ja genau, gschätzti Fäschtmeind dadrüber wett ich hüt rede;

Verantwortig ibernäh und am Läbe Freud ha – so chönnt mer de Titel vo minere Red nänne

Uf de erscht Blick chönt mer ja meine die bede Begriff **Verantwortig ibernäh** und **am Läbe Freud ha** passit nid zäme. Zwei Sache, wo wie Essig und Öl oder wie Käs und Äbberli sind

Vieli Mänsche meined ja au, wer Verantwortig ibernimmt, dörf kei Freud meh ha. Wer erwachse wird, mues s'Lache vergässe und im Chäller verstecke.

Aber ich säge üch hüt: Genau s'Gegeteil isch de Fall.

D'Schwiiz funktioniert nume, wil mir beides chönd. Mier sind starck im Pflichtbewusstsi – aber mir wüssed au ganz gnau, wie mer s'Läbe cha gnüsse.

Verantwortig händ mir Schwiizerinne und Schwiizer äbe im Bluet.

Das fangt scho bi de chlinschte Sache aa.

Dänked nume a üsi legendäri Güseltrännig. Im liisockey sind mir zwar chnapp nid Wältmeischer worde – aber bim Güseltränne simer scho lang die Beschte.

Wenns Gabi oder ich e Aludose i de normali Güselsack rüert, ghört mer bi üs obe im Acher scho en Ufschrei bis i Chile abe und i d'Hoschtet dure.

Mier tränned Karton vo Papier. Mier wäsched Joghurtbecher us, bevor mier sie entsorged. Mier lösed d'Etikette vo de Büchse und mier sortiered s'Glas sogar nach de Farbe.

Aber warum machit mier das eigentlich alles so gnau?

Nei nid öbe wil mini Kollege in Blau hinderem Huusegge mitem Buosseblock wartet – Nei au nid will mier das chönnt - sondern wil mier das vu chli uf glärnt händ:

Ich bi nid nur für mis Läbe verantwortlich – nei ich übernime auf Verantwortig für mini Umwält dass sie suuber bliibt und alles sine Platz hed.

Das isch äbe Verantwortig übernäh...

Oder lueged einisch üses Vereinsläbe aa.

D'Schwiiz isch ja s'Land vo de Vereine – und Gersau isch s'Dorf vo de Vereine.

Turnverein, Fүүrwehr, Samariter, Schie-, Jodel- und Motoclub, Schütze- und Sännegsellschaft, Jungwacht/Blauring, Feldmusig, Burevereinigung, Gnossami, Fight Pigs, Kilbi- und no villes meh.

Gersau hed über 30 Vereine und Organisationene wo Verantwortig übernämit

Aber wer macht jetzt i dene Vereine und Organisationen die ganzi Arbet?

Ja genau Lüüt, wo nach em Fyrabig nid eifach d'Bei höch laggerit, de Färnseh alönt und sich es Bierli gönnt – nei es sind Lüüt wo Verantwortig übernähmit. Aso verstöhnd mich richtig, es Bierli nachem Fyrabig isch nid öbe öpis schlächts gällit

Aber es sind Lüüt wo säged: «jawohl das mach ich ez» «ich übernimme die Verantwortig» «ich organisiere d'Nauenfahrt, d'Versammlig oder s'nächschte Fäscht» «ich gah i Vorstand» «ich mache de Kassier oder de 'Präsidänt»

Das isch äbe gläbti Verantwortig – und das isch de Chläbstoff, wo üses Dorf und de Bärg verschweisst, das isch de Chläber wo üsi Städt und Landschaften i üsere Schwiiz zämehebt

Ohni das frywillige I und zäme Stah wär üsi Gsellschaft zimli fade – scho fascht wie de Wurscht ohni Sänf – wobie en Metzger hed mier mal gseit; «en gueti Wurscht brucht kei Sänf» isch glaubi en Olmametzger gsi - oder anderscht ume; «den Sänf vertüüflet de Wurscht» - aber äbe das isch ja dank Gschmacksach

Verantwortig übernäh heisst au, dass mier bi üs chönd gu abstimme...

Mier i de Schwiiz chönd a fascht a de Urne über alles mitentscheide.

Über Stүүre, Schuele, Strasse, Seilbähndli, Strandbäder, Sportalage, Chileglүүt – und ja au über d'Hohre – oder äbe kei Hohre vo de Chűeh.

Das isch es schöns Privileg wo mier hie bi üs i de Schwiiz hend. Aber es isch au Arbet.

Mer mues sich informiere, a Verastaltige gah und mier sött s'Abstimmigsbüechli läse.

Und das isch ja mængisch rächt trochini Koscht, scho fascht wie Gummelstock ohni Souce. Aber trotzdem mached miers.

Wil mier wüssed genau: Wenn miers nid mached, entscheidet öpper anders über üse Kopf eweg und über üses Wohlergah

Und das händ mir Schwiizer und grad mier Innerschwyzer de öbe gar nid gäre.

So ez jetzt chunnt aber s'grosse Aber: Wenn mier Verantwortig aber übertriibt, chunnts nid guet.

Wenn us Pflichtbewusstsi nur nu Verbisseheit wird, verlüred mer öppis ganz Wichtigs: nämlich üsi d'Liechtigkeit und üsi Freud.

händ ihr mängisch nid au chli s'Gfühl, alles sig gar ärnscht worde?

Hüt mues mer alles optimiere. Prozessabläuf bi de 'Arbet. S'Ässe nach Vitamine. D'Schlaf vor und nach Mitternacht isch wichtig oder äbe nid. Mier zelled d'Schritt mit de Uhre und und...

Und ja genau wenn am Abig keini 10'000 Schritt uf em Display stönd, chunt me sich scho fascht vor wie es Fuultieri.

Gaht nu wieter; mier trinked Sellerie-Erbsli-Rüebli-Smoothies, wo ja schmöcked wie flüssigs Silogras – nume will's gsund söll si...

Für jedes Problem git's es Reglement. Lümmled irgendswu im Park en paar Jungi ume – schriet mer sofort nacheme Verbot und meh Kontrolle duer Kollege in Blau

Giet es Chind uf em Spielplatz um – mues en Videoüberwachig und en Sicherheitsbricht i allne Landessprach ane.

Verstönd mich bitte nid falsch. Sicherheit isch guet und Ornig mues sicher sii und das wo hie uf den Seebühne vor e paar Täg passiert isch, wo irgendseine die Blumetöpf und Schirmständer i See grühert hed – das gaht definitiv nid

Aber chlich wenn mer vor luuter Regle vergässe, s'Läbe eifach mal la laufe, denn werded mier es Volk vo humorlose Paragraferiiter. Und das säg ich us voller Überzüügig au als Polizischt.

Da trifft's doch Sprichwort sehr gut; «weniger isch mängisch meh»

Wenn d'Verantwortig eso schwär wird, dass mer nümme chönnt lache, denn lauft öppis falsch.

E Schwiiz, wo nuur funktioniert, aber nümme lacht, wär nümme üsi Schwiiz – hani Rächt oder hani Rächt?

Aber wie bringed mier ez die beide Sache wie **Verantwortig übernäh** und **Freud am Läbe ha** under ei Huet?

Lueged mer zrugg zu de dry Eidgenosse uf em Rütli bim Schuur zur Eidgenosseschaft 1291:

D'Walter Fürst vum Land Uri, D'Werner Stauffacher vum Land Schwyz und D'Arnold vo Melchtal vum Land Unterwalden.

Die händ zuer säbere Zyt riesigi Sorge gha sie händ unter dene frömde Vögt gliete

Sie händ für Fryheit Kopf und Krage riskiert. Sie händ für ihri Familie und ihri Täler Verantwortig übernuh und de Chopf häre gha.

Aber meined ihr im Ärscht, die dry Eidgenosse sigit nachem RütliSchwur truurig hei gloffe, eigit nur no Wasser trunke und ieri Schritt zällt?

Ich glaube ehjer nid. Die händ bestimmt en chäche Bächer Surremoscht gno, es guets Stück Chäs drzue gässe, glacht und sich uf d'Schultere klopfet.

Will sie händ gwüsst: Kraft für d'Pflicht chunnt us de Freud.

Läbesfreud isch äbe kei Luxus.

Sie isch de Atryb, wo mer überhaupt bruuchit, zum Verantwortig übernah und s'träge.

Mier sind nid nume verantwortlich für d'Stüüre, s'Gschaft oder de Huushalt.

Nei mir sind au verantwortlich für üsi eigei gueti Luune.

Bundesbärn cha nit per Gsetz verordne, dass mir morn alli fröhlicher mönt si – obwohl das no es intressants Gsetz wär.

D'Freud findet mier ja meischtens nid i de tüüre Sache. Sie steckt i de chline Momänt vum Alltag

Es Fäscht i de Familie, lache mit Fründe oder am Stammtisch über en nid ganz politisch korrekte Witz - En Schwumm im See - grad bi dene Temperature vu de letschte Täg oder bade bim Bachuslauf nach de Arbet oder am Morge Früe, de Sunneufgang über üsi Hohflue.

Und bim Grilliere eifach no e zweiti Wurscht druf tue und d'Kalorie für ne Momänt vergässe – das sind äbe die schöne Alltagsmomänte

S'Läbe isch keis Generalabo, wo alles nach Fahrplan laufe sött.

S'Läbe isch mängisch meh wie de Kurs-Bus ufe is Gschwänd.

Es gagelet, isch äng hed Kurve und nu Gägeverkehr.

Und trotzdem chunnt mer meischtens dobe guet aa, will mier am Chaufför vertrit und er – äbe die Verantwortig übernied

Gschätzti Fäschtgmänd,

Vor üs stönd grossi Ufgabe wie d'Altersvorsorg, d'Klimaveränderige d'Energieversorgig, de Handel mit Europa und Übersee, all die Chriege und Naturereignis uf dere Wält.

Das sind alles ärschti Sache und wichtigi Themene.

Die müend mier aapacke. Und das machit mier mit Verstand, mit Fleiss, mit Verantwortig,

Aber sicher nid mit hängende Chöpf - sondern mit eme Lächle im Gsicht.

D'Schwiiz isch nid perfekt. Mier motzed ja gärn emal zum Bispiel wenn de Bus zwei Minute z'spot chunnt, oder wenn kurz de Strom usfällt. De meined mier scho fascht, mier läbed im Drittwältland.

Aber wenn mier ehrlich sind: Üs gaht's doch guet oder.

Mier läbed i Fryheit. Mir läbed i Sicherheit. Und mier händ e Natur mit See'e und Bärge vor de Huustür, wo mer wiet ume muesch gu sueche.

Also wenn s'nächst Mal e schwäri Ufgab vor üs staht, denn mached mers doch wie en Bärgstieger.

De Rucksack isch zwar schwär. De Ufstiig isch cheibe gäch. Aber de Blick gaht ufe und d'Vorfreud uf s'Gipfelbier isch riesig.

Gschätzti Fäschtgmeind,

Lönd mer doch hüt d'Verantwortig für en Momänt la ruehe.

D'Arbet wartet sicher bis morn. De Mails loufed au nid devo. D'Wält dräit sich schön wiiter.

Gnüssed dä 1. August us vollem Härze. Sind dankbar für üsi wunderschöne Schwiiz.

Und nämer üs doch für de Reschte vum Jahr vor: Packed mer a, wo mier bruucht werded.

Aber vergässed mier nie, zwüscheddure z'lache, s'Läbe z'gnüsse und d'Fäscht z'fiire, wie sie grad chömit.

Aso zämegfasst: **Verantwortig übernäh und am Läbe Freud ha**

Ich wünsche eu allne vo Härze en wunderschöne, gmüetliche und fröhliche Bundesfiirtag.

Und ez nämit mier eis ufs Geburstagschind üse schöni Schwiiz!

Prosit mitenand!

Härzliche Dank fürs Zuelose